




DISSERTATIO MEDICA,

INAUGURALIS,

DE

RHEUMATISMO ACUTO.





Digitized by the Internet Archive
in 2020 with funding from
Wellcome Library

DISSERTATIO MEDICA;
INAUGURALIS,
DE
RHEUMATISMO ACUTO.

QUAM
ANNUENTE SUMMO NUMINE,
Ex Auctoritate Reverendi admodum Viri,
D. GULIELMI ROBERTSON, S.S. T.P.
ACADEMIÆ EDINBURGENÆ Praefecti;

NEC NON
Amplissimi SENATUS ACADEMICI consensu,
Et nobilissimae FACULTATIS MEDICÆ decreto;
PRO GRADU DOCTORIS,
SUMMISQUE IN MEDICINA HONORIBUS AC PRIVILEGIIS
RITE ET LEGITIME CONSEQUENDIS;

Eruditorum examini subjicit
GULIELMUS BROOKE,
HIBERNUS,
Societ. Regiae Physic. Edin. Socius,

NEC NON
Societatis Med. Dubl. Sodalis.

Ad diem 24. Junii, hora locoque solitis.

Cujusvis est errare, nullius nisi insipientis in
errore perseverare. CICERO.

EDINBURGI:
Apud BALFOUR et SMELLIE,
Academiae Typographos.

M,DCC,LXXXIX.

Patri suo dilectissimo,
Viro reverendo,
GULIELMO BROOKE,

Qui,
Per totum suae vitae decursum,
Omnia in sese beneficia,
Quae a parente optimo et amantissimo
Sperari potuerint,
Conferenda curavit :

Item,
Viro excellentissimo
JACOBO HAMILTON, M. D. C. R. M. E. S.

Et Nosocomii Regii,
Quod Edinburgi est,
Medico primario,
Ob benevolentiam amicitiamque in sese constanter,
Ex quo Britanniam attigerit,
Demonstratas,
Quae sibi ex memoria,
Nullo tempore nulloque in loco,
Excident ;

Hanc Dissertationem Inauguralem,

Ea, qua par est,

Observantia,

D. D. Cque.

A U C T O R.

DISSERTATIO MEDICA

INAUGURALIS,

DE

RHEUMATISMO ACUTO.

CUM mecum attentus considerabam, quale foret consilium, quo juvenis dissertationem inauguralem in vulgus edere cogeretur; mortales parum novi inde discere posse, cumque hoc tantum, ut legi hujus academiae vetustae rite pareretur, facere, morbum simplicem exequi, quam multum temporis operaeque in dissertatione de aliquo argumento abstruso exaranda, quae spatio, quod medicinae in academia dicavero, haud dubie non superesset, po-

A

nere,

nere, fatius esse duxi. His igitur inductus rheumatismum acutum, qui attentionem medici, quod regiones sub Septentrionibus positas frequenter, et non raro quidem gravissime, infestat, aliqua ex parte mereri videatur, ut materiem hujusce opusculi selegi. Si notiones super hoc morbo perspicue distincteque tradere potuero, nihil amplius exoptabo, nec amplius quidem ab adolofcentulo, qui, in spatium temporis exiguum tantum, operam medicinae navaverit, potuit sperari.

Rheumatismus est unus ex iis morbis, quorum mentionem in operibus medicorum antiquissimorum rarius injici reperimus. Vocabula *Fluxio* et *Defluxio*, quae in operibus Hippocratis et Galeni semet ostendunt, eundem fere morbum, me judice, significant. Historiae vero, quas tradiderunt, tam pressae sunt, tamque parum claritudinis habent, et praeterea adeo cum podagra et catarrho confunduntur, ut neminem in momentum possit latere, eos veram morbi naturam magna ex parte ignorasse; hanc ignorantiam tamen mirari brevi cessabimus, si, quali modo Graeci hisce seculis victitarint, nobiscum reputabimus. Luxuria mollitieque nondum diffuebant,

diffinuebant, et usus liquorum spirituosorum, si vinum excipias, illis ex toto fuit ignotus. Regio insuper, quam tenebant, felicissima morbis inflammationem habentibus, quibus rheumatismus plane annumerandum est, minime fuit amica.

Via medendi, in quam procedebant, ut a priori facile poni potest, a vera et efficace multum deflectebat, et ad vim morbi intendendam potius, quam ad gravitatem signorum levandam, conferebat. Namque eum a materia pituitosa et frigida a capite ad juncturas delapsa pendere existimantes, ut ab usu lanceolae ex toto abstineretur, suaferunt. Botallus fuit primus, qui tali morbi theoriae talique ei medendi rationi adversatus est. Sanguinis detractionem utilem esse contendit, et ea morbum, nonnullis in exemplis, felicissime depulit.

Ballonius, medicus Gallicus, qui, sub initium centuriae decimae sextae, floruit, multum obscuritati, qua hic morbus in tot secula fuerat involutus, luminis offudit, eum et accurate describendum, et discrimina clara et distincta eum inter et podagram instituenda curavit. Viam
medendi

medendi rationalem proponit, et ut ad detractiones sanguinis reiteratas confugiatur suadet. Vestigiis ejus hac in re institerunt quidam ex optimis auctoribus practicis, ut Riverius et Sydenhamius; insuper, vir posterior immortalis multa utilissima de rheumatismi natura et curatione notavit memoriaeque prodidit, ob quae posteri eum summis laudibus ornare nunquam cessabunt. Duo ejus genera esse clare vidit, et igitur in *acutum*, *chronicumque* divisit, viae medendi diversae, cui in utroque debeat insisti, mentionem injiciens.

DEFINITIO MORBI.

Cum optima, quam unquam mihi videri contigerit, in Synopsi Nosologica Culleni clarissimi semet ostendat, eam immutatam adhibere non dubitabo. “ Morbus ab externa et plerumque
“ evidente causa, pyrexia, dolor circa articulos,
“ musculorum tractum sequens, genua et reli-
“ quos majores potius, quam pedum vel manu-
“ um

“um articulos infestans, calore externo auctus.”

HISTORIA MORBI.

Rheumatismus est morbus, qui Britannos multo frequentius, quam incolas regionum ad austrum magis vergentium, infestat. Hillarius clarus, in morbis insulae Barbadoensis depingendis, memoriae prodit, se hunc morbum, dum ibi manebat, vix unquam vidisse. Vere et autumno potissimum accedit, quod, per haece anni tempestates, vicissitudines coeli sunt magnae et subitaneae. Eos praecipue, qui summo juventae vigore laetantur, a pubertate usque ad annum aetatis trigesimum quintum aut quadragessimum etiam *, temperamento sanguineo praeditos,

* Clarus Home in praelectionibus clinicis notat, se, quantum meminerit, nunquam vidisse aegrotum hoc morbo laborantem, qui annum aetatis decimum quintum nondum attigerat, aut quadragessimum fuerat transgressus. Vir doctus vero morbum, quantum ad tempus attinet, limitibus nimis angustis circumscripsisse videtur.

ditos, et foeminas saepius quam mares invadit. A signis pyrexiae communibus et solitis incipit. Sensus frigoris oritur, quem brevi excipit stadium, uti appellatur, calidum, ictibus arteriarum frequentibus plurisque stipatum. Cum haec signa biduum triduumve manserunt, dolores vagantes, acutos, lancinantes, in partibus corporis diversis, potissimum vero in juncturis superiorum inferiorumve extremorum amplioribus, sentire incipit aegrotus. Dolores nonnunquam prius sentiuntur, quam ulla signa febrilia semet ostendunt; hoc vero, uti judico, tantum accidit, cum morbus loco proprio membroque singulari circumscribitur. Junctura in aliquantum temporis affecta, nonnihil tumoris et ruboris accedere consuevit, quod tamen non semper dolorem levat. Morbus raro diu in uno artu fixus manet, sed huc illuc vagatur, cursum musculorum sequens, donec forsitan universas corporis juncturas majores, alias post alias, tentavit. Quam partem relinquit, ea non ejus prorsus expers evadit. Aliquantum tumoris et doloris plerumque manet. Nec pars, quae modo laboravit, iterum corripì non periclitatur. Artus affectus ne minimum quidem motum nunc exercere potest, et tactus levissimus dolorem magnopere

nopere auget. Vespere appetente, signa evidentissime intenduntur, et dolores hoc tempore situm mutare maxime periclitantur; quinetiam aegrotus calorem lecti, utpote qui dolores adaugeat, et ut noctem totam infomnis agat faciat, plerumque gravissime queritur. Quibusdam in casibus, hic morbus ab initio usque aliquanto sudationis stipatur, quae tamen dolores raro levat, nec universa, nec copiosa, quantum ad artum laborantem attinet, is constanter ex toto siccus durusque manet.

Pyrexia ultra duas trefve septimanas raro graviter urget, et deinde remittit; violentia quoque dolorum, qui locum nunc non tam facile mutant, multum diminuitur. Sub initium, urina colorata est, sed nihil sedimenti deponit; finem versus, aliquid pulveris laterum simile praecipitatur, quod raro tamen morbum judicat; alvus semper dura est, et sanguis detractus eandem speciem, quam in aliis morbis inflammationem habentibus, prae se fert. Aegrotus tussi gravi plerumque vexatur, quae signa multum intendit.

D I A G N O S I S.

Res summi in medicina momenti est, morbum unumquemque ab omni alio clare et accurate secernere ; namque, si hoc neglectui habeatur, parumve diligenter attendatur, curationem nullius morbi suscipere valebimus, principiis justis innixi.

Qui morbi, me iudice, eum, quem in praesentia exequor, ulla ex parte referre videntur, ii sunt podagra, syphilis, et scorbutus. Si signa autem singulis horum propria attente considerabimus, discrimina vera, quae eos inter et rheumatismum intercedunt, sine magna difficultate reperientur.

In parte hujusce dissertationis superiore notavi, rheumatismum inflammationem habere, et mortales eo vitae tempore, quo functiones universae et animales et vitales summo vigore peraguntur, invadere. Originem ejus alicui causae
in

in systema agenti, exempli gratia, frigori saepe pro certo fere referre valemus, juncturas corporis majores invadit, et mirabilem ad migrandum ex alio in alium locum proclivitatem ostendit. Mulieres ei * magis, quam viri, patent, et morbus semel depulsus nunquam, per totam vitae longae decursum, forsitan repetet.

Podagra, contra, pro morbo profus nervoso ab omnibus medicis, quotquot sunt, habetur. Ante annum aetatis quadragesimum raro semet ostendit, et evidenter ab aliqua causa interna occulta, qualibet re forsitan statum potestatum vitalium debilitatum faciente, proficiscitur. Aliquos ex artubus minoribus, potissimum pedis pollicem, occupat. Dolor multo magis, quam in rheumatismo, acutus est, et ad sedem mutandam minime proclivis, nisi ad pravam medendi viam fuerat decursum; insuper morbus est, qui a tabe haereditaria profluit, et,

B

cum

* Vir clarus Dr Home, praxi sua in nosocomio regio Edinensi edoctus, notavit, foeminas, quae in rheumatismum incidunt, quantum ad numerum spectat, mares plus, quam 3. 1. excedere. Hoc negligentiae illarum, dum proveniunt menstrua, quo tempore systemata muliebria causis excitantibus facillime afficiuntur, tribuendum putat.

cum semel invasit, frequenter, et etiam quibusdam statis temporibus, reditum esse concludere licet. Ei opportuniores sunt viri, quam mulieres, obesi et robusti, temperamento cholero-sanguineo praediti, quam ii, quibus natura ex toto sanguineum impendit. In vicem paroxysmorum podagrae frequenter substituuntur similes morbi quorundam e visceribus internis, quadam alternatione, modo hi, modo illi dominantur. In aliquot dies ante paroxysmum, ventriculus plurimum perturbatur. Torporem universum una cum sensu punctionis et stuporis artuum inferiorum, quae sensus frigoris pedum spasmi-que frequentes * comitantur, sentit aegrotus; nullae vero hujuscemodi alternationes, aut signa antecedentia, unquam in rheumatismo semet ostendunt; materia cretacea saepe in artubus podagra laborantibus; nunquam vero, quantum meminerim, in iis, qui rheumatismo infestantur, reperitur.

Haec sunt, me iudice, signa manifestissima, quibus rheumatismus et podagra dignoscuntur; et, si ea attentione, quam merentur, considerantur, nullo in exemplo, quod semet ostende-

re

* Vide Cullen. Prim. Lim. vol. II. § 506.

re potest, in errorem incidere periclitabitur medicus.

Quantum scorbutum spectat, hunc a rheumatismo satis evidenter secernunt, ictus arteriarum debiles et exiles, gingivae putridae, crura tumefacta, maculae lividae, et profusiones sanguinis variae, quae scorbuto nunquam defunt; et, contra, in rheumatismi nullo exemplo apparent.

Si dolores in centro longorum ossium sedent, praesertim si signa affectus loco proprii antecesserint, quin vitium sit venereum, vix potest dubitari; denique in lue partes, ubi dolores sedent, non tactui dolent, ut in rheumatismo incidit. Rheumatismus acutus et chronicus semet mutuo aliqua ex parte reddunt. Cum res ita sese habeat, si hanc similitudinem silentio praeterirem, praesertim cum curatio hujus et illius magnopere differat, mihi, non sine gravi quidem ratione, vitio verti posset. Cum chronicus plerumque acuti sequela sit, ubi unus incipit, aut alter finitur, compertu saepe difficile est; si omnia signa febrilia decesserunt, si tumor ruborque artuum ex toto subsederunt; dolor vero adhuc
gravis

gravis manet, sed calore, utcunque applicetur, levatur, morbus haud dubie chronicus est. In hoc artus laborantes frigidi rigidique esse reperiuntur, et perspiratio partis affectae libera vix ullo modo potest moveri. Si morbus lumbos occupat, Lumbago appellatur; et a Nephritide facile distinguitur, quod signa, quae in hac semet constanter ostendunt, sequentia ex toto desunt, nausea nempe, vomitio, femoris stupor, testiculi retractio. Cum coxendicem tenet, nomen Sciatica ei indi solet. Non alienum erit notare, rheumatismum chronicum artus, quos maximus musculorum numerus circumdat, infestare malle videri.

CAUSAE REMOTAE.

Has in eas, quae homines ad morbum proclives efficiunt, et in eas quae eundem excitant, dividam; de iis separatim agam.

Quae proclivitatem ad morbum constituunt, eae sunt, ut Gregorius jure celeberrimus inquit:

“ Quae

“ Quae corpus tantum morbo opportunum red-
 “ dunt ; scilicet, ut, admota causa excitante, in
 “ morbum incidat *.”

Diatthesin phlogisticam tonumve systematis arteriosi adauctum mortales huic morbo opportunos efficere, multa satis evidenter manifesteque demonstrant. Supra comprehendi incolas regionum, quae ad Septentriones spectant, et eos, qui mediam aetatem attigerunt, rheumatismo maxime patere ; nemo autem, uti spero, negabit, diatthesin phlogisticam in hominibus hujusmodi clare evidenterque dominari, quin etiam compertum habetur, rationem victus plenioris exercitationi pariori adjunctam, evacuationes, quibus corpus insueverit, subito cessantes, ut perspirationem, menstrua, sanguinis missionem, diarrhoeam, haemorrhoidem, aliamve haemorrhagiam, fetacea, epispastica, et similia, ad morbum excitandum, hanc diatthesin augendo, potenter conferre. Et, auctoritate Sydenhamii sagacis confisi, medicamenta tonica diu adhibita morbum movisse, asserere non dubitamus.

Insuper,

* Vide Conspect. Med. Theor. § 39.

Insuper, quidam in animum sibi induxerunt, statum debilitatis evacuationibus immodicis similibusque factum mortales ad morbum pronos efficere. Quo modo vero duae corporis conditiones sibi invicem adeo contrariae morbum eundem progignere possint, intelligere nequeo; imo notio, quantum judicare possum, rationi adversari videtur. Animus mihi non parum inclinatur, ut credam, medicos semet hac in re decipi passos fuisse, quod, quam subito systema detrimenta, quae ab evacuationibus hujusmodi ceperit, repenset, quamque brevi post eas nimis plenum evadere periclitetur, ut clare demonstravit Cullenus illustris*, non attenti considerarunt. Modo positis hoc adjungere possum, quod in exemplis bene multis, quae mihi in nosocomio regio Edinenfi videre contigerit, aegrotus unusquisque signa habitus corporis phlogistici manifesta edebat. Ne levissima quidem, ullo in casu, fuit ratio, cur morbum a debilitate, quae antea extiterit, proficisci existimarem.

Proximum est, ut de causis excitantibus dicam, quarum complures forsitan esse possunt, quae attentionem medicorum adhuc fugerunt; praecipuam

* Vide First Lines of the Practice of Medicine.

praecipuam vero et longe creberrimam frigus quolibet modo corpori applicatum esse credo. Quo effectus suos edere valent, ut infra gradum thermometri Fahrenheiteani sexagesimum secundum descendat necesse est. Actio ejus multo potentior evadet, si humiditate stipabitur, et in tempus diuturnum corpori ante calefacto admovebitur. Non opus est, ut corpus universum frigori objiciatur; sufficit ut ad quamlibet partem ejus singularem adspirare permittatur. Hinc plurimos rheumatismum, quo conflictantur, vestimentis uvidis tribuere saepe reperimus. Namque ita gradus frigoris intensus per evaporationem, quae incidat necesse est, progeneratur.

CAUSA PROXIMA.

Nulla, uti credo, artis Hippocraticae pars est, quae majore obscuritate, quam causae morborum proximae, est implicita. De his medici, qui diversis seculis floruerunt, longe diversa memoriae prodiderunt. Alii alia de causa rheumatismi proxima senserunt. Professor quidem,
qui

qui summam claritudinem sibi comparaverat, lentorem humorum pro ea habuit ; et nemo medicorum fere opinioni ejus fidem derogare ausus est ; saltem in multos annos, tanta fuit ejus auctoritas, et tanta fuit fama, quam sibi fuerat adeptus. Acrimonia quoque suos patronos habuit. Utraque doctrina fundamento ex aequo instabili innititur. Has vero paucissimis etiam percurrere omnino supervacaneum esse duco, propterea quod Cullenus sagacissimus eas in suis Primis Lineis clare manifesteque refellit et convulsit. Causa autem proxima, hoc auctore ingenioso judice, est constrictio vasorum extremorum spasmodica, causa excitante corpori applicata facta. Quinetiam frigus corpori admotum tonum vasorum partis laborantis intendit, impetum sanguinis in iis acceleratum movens. Insuper, hinc transitui ejus libero non parum obsistitur. Consilio verò haec omnia signa tollendi, vires naturae medicatrices potenter agere incipientes, stadium frigidum, spasmusque, ut modo significavimus, edunt, unde brevi pyrexia in systemate proficiscitur universa. Praeterea vir eruditissimus fibras musculares, hoc in morbo, praeter consuetudinem rigidas esse ponit ; unde postea multa signorum exponere conabor.

RATIO SIGNORUM.

Rubor, calor, tumorque a quantitate sanguinis in vasis partis laborantis adaucta proficiuntur. Et cum transitui sanguinis libero resistatur, facile concipi potest, tenuiores ejusdem partes in telam cellulofam effundi posse; quod tumorem magnopere intendat oportet. Dolorem quoque eidem causae tribuere possumus. Namque, quin vasa sanguifera exilia nervis numerosis sint instructa ambigi nequit. Distensio autem quam subeunt cuique, ob statum fibrarum muscularium rigidum supra comprehensum, aegre cedunt, ut sensilitas iis propria multum augeatur, haud dubie faciet. Insuper, auctor ingeniosus, Dr M^cBride, notavit, dolores acutissimos in inflammatione ligamentorum partiumque membranis instructarum hinc proficisci, quod vasa partium hujusmodi modo rectilineo procurrunt, quod in causa, cur stimulo distensionis nimiae magis afficiantur, non esse non potest. Si fibras musculares praeter naturam ri-

gidas esse concedamus, facillime, cur dolores, dum ab aliis ad alias juncturas migrant, cursum musculorum accuratissime subsequantur, explicare valebimus. Hic, cur artus minores nunquam infestentur, quaeri potest. Quantum ad hoc attinet, Cullenus eruditissimus in praelectionibus suis ponit, ligamenta carpi talisque circumdata aliquantum, in modum impedimentorum musici instrumenti chordis instructi, agere, et ita, ne oscillationes doloris ulterius proferantur, cavere.

P R O G N O S I S.

Quamquam rheumatismus unus ex iis morbis est, qui plus doloris, quam periculi, habent; prognosis tamen in faustam et infaustam jure dividi posse existimo. Si nondum multum aetatis aegroto accesserit, si bono corporis habitu praeditus sit, et nec huic, nec alii morbo, pateat; si signa febrilia non concitiora sint, et dolor non gravissime urgeat; si somnus arctus reficiensque, sudore universo copioso stipatus, obrepat,

obrepat, qui manet aliquamdiu, ictusque arteriarum molliores minusque frequentes efficit, exitum morbi faustum fore pro certo concludere licet. Spem hujus eventus exoptandi magis magisque firmabunt sequentia, urina limpida, sedimentum albidum deponens, et quantitate praeter consuetudinem magna profusa; lingua pura evadens, et appetentia cibi rediens. Nec exempla defunt, ubi diarrhoea sponte accedens, sanguis ex aliqua parte profusus, eruptiones cutaneae, vel ulcera in partibus, quibus epispastica fuerant admota, orta morbum judicarunt, et ex toto depulerunt.

Contra, cum in hominem, aetate bene pro-
vectum, invadit, cui vires gravitate ejus et spatio convulsae sint, quemque forsitan non raro infestaverit; cum temere fuit curatus, et dolores in una junctura fixi manent, prognosin dubiam, et nulla ex parte faustam, esse oportet. Namque summo cum dolore saepe reperimus, morbum ita sese habentem, licet in optimas, quae notae sint, medendi vias procedatur, in rheumatismum chronicum pertinacem, paralyfin insanabilem, rigiditatem vel forsitan juncturae laborantis anchylosin, desinere.

Morbus,

Morbus, quem exequor, resolutione plerumque finitur. Exempla, ubi in schirrum aut gangraenam desiit, raro, uti credo, vel nulla sunt. Et, quanquam reliquas phlegmasias magnopere reddit, ad suppurationem tamen raro progreditur; quod huic referendum puto, quod morbus ligamenta, quae ad suppurationem minime prona sunt, potissimum tenet. Ad suppurationem vero nihilominus aliquando pervenire, exempla non pauca, quae in monumentis medicinae sunt reperiunda, abunde testantur. Vir clarus Stork Viennensis, ut ex opere ejus, quod *Annus Medicus* inscribitur, judicare licet, multos hujusmodi casus offendisse videtur. Tumores iis proprii discuti nequiverunt, aperti multum puris effuderunt, et vulnera curationem difficillime receperunt. “Longo tempore,” inquit, “diversa remedia externa tentavit dominus Hassner; optatam tamen metam nunquam potuit attingere.” Multi posuerunt, rheumatismum, a junctura laborante ad cerebrum vel alia viscera migrando, mortem frequenter inferre. Hanc opinionem vero jam repudiavi. Quandocunque dolores ventriculum aliasve partes internas occupant, eos non a rheumatismo, sed ab arthritide, proficisci opinor. Vir
clarus

clarus supra positus, Stork Viennensis, memoriae prodit, omnes, qui phthisi vera et rheumatismo laboraverunt, fato concessisse; sed, ut mortem eorum illi potius, quam huic morbo, tribuens, animus mihi non parum inclinatur.

RATIO MEDENDI.

Praecipuum autem huic morbo medendi consilium est diathesin phlogisticam tollere. Nihil, quod in hanc potest, neglectui habendum. Fides vero in sanguinis detractione potissimum collocanda. Ad hanc, sub initium rheumatismi, constanter decurratur, et, cum nullus morbus hanc evacuationem tam facile ferat, minime parcus sit. Non opinari non possum, copiosam sanguinis detractionem, morbo incipiente, ad quatuordecim sedecimve uncias usque forsitan, dummodo vires aegrotantis hanc possint tolerare, multo plus ad dolores levandos, quam viginti pluresve uncias diversis temporibus emissas, esse collaturam. Quo vasa sanguifera relaxationem repentinam subeant, sanguis rivo
quam

quam plenissimo effluat necesse est. Cum una sanguinis detractio, quanquam liberalis fuerit, ad signa levanda saepe non sufficiat, si proximo die dolores aequae fere urgere, pulsus arteriarum validos, plenos, et frequentes esse reperiamus, ad alteram sanguinis detractioem confugiatur. Sydenhamius illustrissimus, ut hanc in tertium diem differamus, et intercedente medicamentum purgans adhibeamus, monet. Nullam vero rationem novi, cur tamdiu debeat proferre, praesertim cum omnis medici prudentis et honesti sit, finem morbi quam citissime facere. Nonnulli tertiam sanguinis missionem praecipiunt, et necessariam esse contendunt. Magno-pere vero cavendum est, ne vires systemati nimis convellamus, quod haud dubie ut aeger tarde restituatur, et forsitan ut morbus in chronicum, finem qui parum famae medico afferet, convertatur, faciet. Multum fructus hoc in morbo et detractioibus sanguinis topicis percipiendum. Alteram missionem generalem frequenter, primum vero nunquam, si morbus universum corpus teneat, parum necessariam efficiunt. Si, contra, dolor tumorque in junctura singulari resideant, quaecunque commoda a sanguinis detractioe profluere solent, ea omnia ab hirudinibus numerosis ei circumdatis speranda.

Cucur-

Cucurbitulae cruentae, uti appellantur, cum parti rite possunt admoveri, eidem omnino, cui hirudines, consilio respondent. Vomitionem, sub initium, ciere necessariam esse plerumque reperietur; quoniam ventriculum fordibus liberabit, corpus ad perspirationem magis proclive efficiet, et tussim, quae multum molestiae saepe faceffit, levabit.

Purgatio alvi, utpote quae systema potenter depleat, primo intuitu quam maxime convenire videtur. Si vero rem penitissime inspicias, non percipere non poteris, molestiam auctumque doloris, quibus stipetur necesse est, multo plus quam ulla commoda, quae inde possint oriri, aequare. Eodem tempore vero omnino erit necessarium alvum, quo nihil irritationis a faecibus in recto duratis proficiscatur, modice solutam tenere. Hoc facile praestabunt enemata emollientia in alvum immissa. Si haec vero admodum fuerit adstricta, ad aliquos e salibus medicamentis refrigerantibus confugiatur, vel ad similia saltem.

Postquam plus minusve sanguinis, pro natura morbi, fuit detractum, curationem medicamentis,

tis, quae sudorem movent, perficere conandum est, quae prudenter adhibita consilio efficacissime respondebunt. In sanguinis detractione haud dubie eo usque, ut morbus ex toto tollatur, perstare potest. In omni exemplo vero pro certo sperandum est, sequelas, quas supra recensuerimus, esse subsecuturas, quibus sudatio omnino caret.

In hac parte curationis igitur, consilium medendi est sudorem universum et copiosum elicere; quod multis modis fieri potest. Eundem, vel medicamenta calefacientia et stimulantia dando, vel corpus nimio stragulorum pondere onerando, nunquam extorquere conandum est; namque in hanc medendi viam procedendo multum intendetur febris. Caeterum consilio optime respondebunt ea medicamenta, quae cursum humorum ad superficiem certo et efficaciter faciunt. Optimum, quodque hodie in usu maxime vulgare est, est compositum quod pulvis Doverianus appellatur. Antequam fumitur, aeger in stragulis laneis collocetur, indusiumque laneum induat, quo sudor, cum profluere incipit, non frigore, quo lintea humida corpus impertiuntur, reprimatur. Incipere possimus a
quin.

quindecim pulveris granis, ad viginti quinque usque, ex intervallo horarum duarum aut circiter, donec sudor liberalis erumpat, repetendis. Sudorem continuabunt et promovebunt liquores quilibet tenues tepidique copiose dati; ut aqua hordeata, serum lactis succo limoniorum vel cremore tartari paratum, vel vinum aliquod albidum, non valens, cujus multo plus, quam reliquorum, bibere potest aegrotus. Si sudorem diminui reperiamus, viginti aut triginta guttae vini antimonii vel ipecacuanhae, quibus totidem tincturae thebaicae sunt adjunctae, sub forma haustus sumendae. Hoc modo sudor in viginti quatuor, vel quadraginta octo, si opus sit, horas conservari potest. Quantum vero hoc spectat, levatione, quam doloribus comparaverit, et viribus aegroti, ex toto regi debemus. Cum pedes penitus sicci manent, vesicas aqua calida semirepletas, arenam calefactam in saccos inclusam, vel lateres calefactos, iis circumdare conveniet; quod ut vasa relaxentur, et sudor ibi, ut in aliis corporis partibus, erumpat faciet. Vix operae pretium esse videtur notare, sudorem, si frigidus, tenax, locoque proprius sit, et non brevi dolores levat, nihil prodesse consuevisse. Igitur, cum nihil boni inde sperandum

D

fit,

fit, eum levandi conatis protinus desistere debemus. Medici ut pulverem mane dare incipiamus suadent, quoniam omnes secretiones multo majore vigore die, quam noctu, dum dormitur, peraguntur.

Nitrum medicamentum ad sudorem movendum excellenter accommodatum esse dicitur. Id in curatione hujusce morbi multis laudibus effert vir clarus Dr Brocklersby; et eum ad decem drachmas ex aqua solutas, singulis diebus, dabat, et in usu ejus aliquandiu perstabat, se morbum saepe depulisse affirmat. Medicamentum vero tam ingratum est, ut paucissimis, me judice, eo satis liberaliter uti posset persuaderi.

Materia medica multa alia potentia medicamenta sudorifica comprehendit, qualia sunt sal, quod spiritus Mindereri vocatur, calx antimonii nitrata, pulvis Jacobi, &c. Cum vero nulla eorum effectus aequae certos, ac pulvis Doverianus supra positus, edere soleant, ea silentio praeterire decrevi. Sub initium morbi opiata haud dubie aliena sunt. Cum vero evacuationes idoneae factae sunt, et febris minus concitata evasit, dolores levandi, et somnum aegroto, qui,
fine

sine ulla dubitatione, ei admodum necessarius est, quaerendi consilio ad ea confugi potest. Iis adjungi debent viginti pluresve vini ipecacuanhae guttae, quae usum eorum tutiorem efficient, et ad diaphoresin lenem, quae plurimum proderit, conservandam multum conferent.

De usu mercurii in acuto rheumatismo depellendo, apud medicos nondum ex toto convenit. Clarus Musgravius testatur, se morbum eo adeo, ut sputum moveret, dato saepe sanasse. Celebris vero Dr D. Monro eum nunquam, nisi systemate lue venerea infecto, proficere compertus est. Vir expertus Dr Robertus Hamilton, qui Lini Regis medicinam facit, dissertationem in volumine nono Medicorum Commentariorum Edinensium in vulgus edidit, ubi usum mercurii opiique in omnibus morbis inflammationem habentibus, et praesertim in acuto rheumatismo, summis laudibus ornat. Qua ratione morbo medendi usus est, eam suis verbis depingendam curabo.

“ Blood was directed to be taken away in the
 “ beginning of the disease, in quantity proportioned to the violence of the inflammatory
 “ symp-

“ symptoms, and the age and constitution of the
“ patient. The bowels were next ordered to
“ be emptied by a glyster, or, more commonly,
“ by an eccoprotic purgative. After which a
“ composition, consisting of from five to one
“ grain of calomel, and from one to one-fourth
“ of a grain of opium (with any conserve in a
“ bolus) in proportion to the strength and age
“ of the patient, was administered every six,
“ eight, or twelve hours, as the degree of in-
“ flammation, or the threatening aspect of the
“ distemper, seemed to require. And a plenti-
“ ful dilution with barley-water, or any other
“ weak tepid beverage, was, at the same time,
“ strictly enjoined. After taking three or four
“ doses of this medicine, in the course of 24
“ hours, the patient was generally greatly re-
“ lieved; and, in 24 more, the distemper com-
“ monly gave way, and soon terminated. But
“ if the patient was not relieved in the first 24
“ hours, and the inflammatory symptoms con-
“ tinued, with little abatement, (which was
“ rarely the case) more blood was taken away,
“ and the mercurial composition was directed
“ to be more frequently given and continued,
“ until the distemper resolved either by sweat-
“ ing,

“ing, purging, or more commonly both, or by
“a ptyalism being raised.”

Cum cutis contracta et arida febrim comitabatur, aliquantum tartari emetici camphoraeve bolo plerumque adjecit. Ne aliquis vero curationem hisce medicamentis potius, quam mercurio, tribuerat; haec per se frequenter dedit, et morbum cedere nunquam compertus est, donec iis calomelas adjunxit. Quinetiam notavit, hanc medendi viam, nisi in eam, morbo nondum longe profecto, praecederetur, votis non tam certo respondere.

Cum actionem mercurii stimulare neminem lateat, curationem hujusce morbi ei ulla ex parte referre primo intuitu nollemus. Si vero res verae, de quibus nequit dubitari, quaeque, ut Doctor ait, non ab experientia paucorum mensium pendent, sed fundamento praxeos octodecim fere annorum felicitis solido innituntur, theoriae adversantur, posterior prioribus apud unumquemque candidum cedat necesse est. Quantum ad memetipsum attinet, nihil de praxi pro certo asserere audeo, quoniam ejus periculum nunquam fieri vidi. Rectum vero justum-
que

que esse sentio, ut candide accurateque tentetur, quo vel merito suo stet ejusdemve defectu repudietur.

Corticis Peruviani in curatione hujusce morbi mentio facta fuit ; sed ad eum nunquam debet decurri, donec urina sedimentum lateritium deponat, cum notae inflammationis magna ex parte sublatae esse dicuntur. Si paroxysmi doloris regulares urgeant, rebus ita se habentibus, cortex haud dubie proderit.

Applicationes externae multum concelebratae fuerunt. Cum vero omnes dotes earum, si sub initium adhibeantur, nocivas esse compertum habeant, iis hodierni caute abstinent. Contra, morbo inclinato, multum auxilii promittunt, et signa loco propria, quae plerumque in brevius longiusve temporis spatium, malo superato, manent, tollendo revera plurimum profunt. Epispastica reliquis potentiora sunt, et dolores fixos abigendi causa, cum summo commodo, saepe applicantur. Omnia linimenta eidem consilio aliqua ex parte quoque respondent. Et frictio, quae in his applicandis adhibetur, ad dolorem vel rigiditatem, quae juncturas etiamnum occu-
pare

pare potest, tollendam multum facit. Si dolor pertinax superfit, fonticulus, uti Monroius illustri docet, prope partem laborantem apertus eum discedere coget. Camphora dolorem plurimum levat ; sed Cullenus affirmat eam, ut migret locumque mutet, facere.

Summa cura et attentio per totum morbi decursum sunt adhibendae. Ægroto omni cibo animali talique, qualis concoctu difficilis est, ex toto interdicatur. Insuper omnibus liquoribus valentioribus et fermentatis abstineat, cibus e substantiis vegetabilibus et farinaceis constet. Potus succo limoniorum, cremore tartari, vel similibus, modice acidus reddatur. Jam firme sibi persuasum habuit Sydenhamius, summum fructum a diaeta idonea stricte adhibita percipi posse, ut morbum sine medicamentis depellere proposuerit, et revera depulerit. Ratio, cui insisterit, fuit aegrotis curae suae demandatis ferum lactis solum, in complures dies, praecipere, et, feбри hoc modo multum diminuta, exiguam panis quantitatem illis concedere. Haec mendendi via votis, sine dubio, responderet, si aegrotis, ut ea uterentur, posset suaderi. Omnis
frictio

frictio artus tumefacti vitetur, et hoc consilio machina ad stragula sustinenda accommodata excogitetur. Pars denique laborans panno laneo mollissimo circumdetur.

F I N I S.

CORRIGENDA.

Pag.	2.	l.	10.	potuit <i>lege</i> poterit
	6.		14.	juncturae
	9.		19.	labe
	12.		6.	occupet
	14.		18.	corporis <i>lege</i> corporei
	15.		3.	valent <i>lege</i> valeat
	21.		4.	tribuem <i>lege</i> tribuam
	22.		11.	proferri
	22.		20.	et <i>lege</i> a
	29.		7.	tribueret
	31.		14.	jam <i>lege</i> tam